



Comunu de Quartu Sant'Aleni



Torrat a bivi su Prèmiu literàriu in lìngua sarda “Tzitadi de Quartu Sant'Aleni”, pratziau in tres setzionis

S'interessu de Quartu po sa lìngua sarda est sèmpiri prus biu. Is abritius chi bolint portai a connosci e a avalorai su chistionai de s'Ìsula nosta sighint a cresci. Nascit difatis su Prèmiu literàriu “Tzitadi de Quartu Sant'Aleni”, inclùdiu in su progetu “Si

ghetat custu bandu” cun sa punna de ingreghiai sa genti e ammanniai is oportunitadis de fai svilupai cumpetènzias specifìcas.

Su Prèmiu nascit de una idea de s’Acadèmia de sa lùngua sarda campidanesa O.N.L.U.S., cun s’agiudu de su Lions Club de Quartu Sant’Aleni e de s’Assòtziu Rimas, cun su patrocìnio de su Comunu pro mèdiu de sa rassina, chi de annus promovit is costumàntzias de su logu e s’identidadi, in sa domu campidanesa antiga “Sa domu de farra”, in mesu bidda. Sunt medas difatis is organizatzionis chi si movint in citadi po non perdi is richesas de su tempus passau, marchendi is valoris e is primoris po chi bèngiant castiadas e passadas de babu in fillu.

Pigai parti a su Prèmiu “Tzitadi de Quartu Sant’Aleni”, agiudau de is assòtzius unius in sa retza, in is eventus de su stadiali e de s’atòngiu de sa rassina “Si ghetat custu bandu”, est a indonu. Est pratzida in tres setzionis: su Mutetu, sa Prosa e su Teàtru. Ònnia partecipanti at a podi scioberai una categoria e intregai feti un’òpera in sardu chi niscuinu connoscat de giai. Chi s’òpera est scritta in una varianti diferenti de su campidanesu est agradèssia sa furriadura in italianu.

“Su prèmiu literariu fut giai stètiu fatu in su 2005 e po cincu annus si fut firmau. Imoi s’Acadèmia de sa lùngua sarda campidanesa, nàscia giustu in Quartu po manteni sa cultura de s’identidadi, prus che totu cussa de sa lùngua, at decìdiu de ddu torrai a promovi, ammanniendiddu a tres setzionis – spiegat su Vice Presidenti Tonio Pani – Punnaus a avalorai prus che totu su mutetu, unu cumponimentu chi non tenit ogualis in su mundu, chi est parti de sa poesia cantada, ma chi depeus torrai a scoberri e craculai puru po is struturas literàrias, ca est biu cumentì a una òpera perfeta.”

S’avaloramentu de custu Prèmiu andat a inantis in pari a sa presentazioni a s’U.N.E.S.C.O de parti de is Lions Quartu, de sa domanda de reconnoscimentu de custu cumponimentu e de sa cantada campidanesa cumentì a patrimoniu materiali de s’umanidadi.

Sunt prevìdius prèmius po su primu, su segundu e su de tres postus, cun unu totali de 550 èurus a setzioni. In sa giuria ddoi ant a essi espertus connotus po ònnia setzioni. Is traballus ant a depi essi presentaus aintru de is 13:00 de su 10 de su mesi de idas 2024 e ant a depi pertocai totus sa Sardigna. Sa premiatzioni at a essi cun ònnia probabilidadi in gennàrgiu, sa diri de sa pasca de is tres Gurreis.